



# basic education

Department:  
Basic Education  
**REPUBLIC OF SOUTH AFRICA**

## NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LESIBILI (P2)

INDLOVANA/INDLOVULENKHULU 2017

EMAMAKI: 80

SIKHATSI: Ema-awa 2½

Leliphepha linemakhasi la-24.

**TICONDZISO KULABAHLOLWAKO**

1. Fundzisisa leticondziso ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lesine bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimpawu kuphela bese ukhetsa leyo lofuna kuphendvula yona.

3. Liphepha lemibuto licuketse TIGABA LETINTSATFU:

SIGABA A:	Tinkondlo	(30)
SIGABA B:	Inoveli/Temdzabu	(25)
SIGABA C:	Umdlalo	(25)

4. ISIHLANU IMIBUTO lefanele uyiphendvule seyiyonkhe: ESIGABENI A imibuto MITSATFU (3), ESIGABENI B MUNYE (1), ESIGABENI C MUNYE (1) ngalendlela:

**SIGABA A: TINKONDLO**

TINKONDLO LETIFUNDVWE EKLASINI - Phendvula imibuto ibe mibili.  
ENKONDLWENI LENGAKAFUNDVWA EKLASINI – Uphocelelekile kuphendvula lombuto.

**SIGABA B: INOVELI/TEMDZABU**

Phendvula umbuto ube MUNYE.

**SIGABA C: UMDLALO**

Phendvula umbuto ube MUNYE.

5. KUKHETFWA KWETIMPHENDVULO TESIGABA B (INOVELI/TEMDZABU) NESIGABA C (UMDLALO)

- Phendvula KUPHELA imibuto yenoveli/temdzabu loyifundzile kanye nemdlalo lowufundzile.
- Phendvula UMBUTO MUNYE WENDZABAMBHALO kanye NAMUNYE UMBUTO EMIBUTWENI LEMIFISHA. Nangabe ukhetse kuphendvula umbuto wendzabambhalo ESIGABENI B, uphocelelekile kutsi uphendvule imibuto lemifisha ESIGABENI C. Uma uphendvule imibuto lemifisha ESIGABENI B, uphocelelekile kutsi uphendvule umbuto wendzabambhalo ESIGABENI C. Sebentisa luhlu lwekutikhumbuta kute usitakale.

## 6. BUDZE BETIMPHENDVULO

- Imibuto yendzabambhalo etinkondlweni kufanele iphendvulwe ngemagama la-190–240.
- Indzabambhalo yenoveli/temdzabu nemdlalo kufanele iphendvulwe ngemagama la-340–390.
- Budze betimphendvulo temibuto lemifisha bufanele buhambisane nelinani lemamaki labekiwe. Labahlolwako kufanele banganhlanhlatsi.

7. Fundzisa kahle ticondziso letisekucaleni kwaleso NALESO SIGABA.

8. Tinombolo tetimphendvulo atihambisane naleto temibuto njengobe tinjalo ephepheni lemibuto.

9. Cala LESO NALESO SIGABA ekhasini LELISHA.

10. Siphakamiso sekulawulwa kwesikhatsi:

SIGABA A: Lokungenani emaminitsi la-40

SIGABA B: Lokungenani emaminitsi la-55

SIGABA C: Lokungenani emaminitsi la-55

11. Bhala ngesandla lesibonakalako nalesifundzekako.

**LIKHASI LALOKUCUKETFWE**

Lelikhasi litawusita bahlolwa kutsi bakwati kukhetsa imibuto labafuna kuyiphendvula ngaphandle kwekufundza lonkhe liphepha lemibuto.

<b>SIGABA A: TINKONDLO</b>			
<b>Tinkondlo letifundvwe eklasini: Phendvula nobe nguYIPHI imibuto LEMIBILI.</b>			
<b>INOMBOLO YEMBUTO</b>	<b>UMBUTO</b>	<b>EMAMAKI</b>	<b>LIKHASI</b>
1. 'Kuhle Ketfu'	Umbuto loyindzatjanambhalo	10	6
2. 'Kants' Uphumula Nini?'	Imibuto lemifisha	10	7
3. 'Iwil' Insika'	Imibuto lemifisha	10	8
4. 'Nkhosi Yemkhatsi'	Imibuto lemifisha	10	10
<b>NA</b>			
<b>Inkondlo lengakafundvwa eklasini: Uphocelekile kuphendvula lombuto.</b>			
5. 'Malandzakati'	Imibuto lemifisha	10	11
* <b>CAPHELA:</b> Phendvula UMBUTO MUNYE WENDZABAMBHALO kanye NAMUNYE UMBUTO EMBUTWENI LEMIFISHA. Nangabe ukhetse kuphendvula umbuto wenzabambhalo ESIGABENI B, uphocelekile kutsi uphendvule imibuto lemifisha ESIGABENI C. ESIGABENI B naseSIGABENI C, phendvula umbuto MUNYE kuphela.			
<b>SIGABA B: INOVELI/TEMDZABU</b>			
<b>INOVELI: Phendvula umbuto ube MUNYE kulamanoveli lemisiwe.</b>			
6. <i>Liphume Nebovu</i>	Umbuto loyindzabambhalo	25	13
7. <i>Liphume Nebovu</i>	Imibuto lemifisha	25	13
8. <i>Kubamba Letingelako</i>	Umbuto loyindzabambhalo	25	15
9. <i>Kubamba Letingelako</i>	Imibuto lemifisha	25	15
<b>NOBE</b>			
<b>TEMDZABU: Phendvula umbuto ube MUNYE kulena yetemdzabu lemisiwe.</b>			
10. <i>Silulu SeMaswati</i>	Umbuto loyindzabambhalo	25	17
11. <i>Silulu SeMaswati</i>	Imibuto lemifisha	25	17
<b>SIGABA C: UMDLALO</b>			
<b>Phendvula umbuto ube MUNYE kuleti timidlalo letimisiwe.</b>			
12. <i>Kwahlwa Emini</i>	Umbuto loyindzabambhalo	25	19
13. <i>Kwahlwa Emini</i>	Imibuto lemifisha	25	19
14. <i>Umvuzo</i>	Umbuto loyindzabambhalo	25	22
15. <i>Umvuzo</i>	Imibuto lemifisha	25	22

**CAPHELA:** ESIGABENI B ne-C, munye umbuto lophendvuliwe ufanele ube YINDZABAMBHALO nobe IMIBUTO LEMIFISHA. Awukavumeleki kutsi uphendvule tindzabambhalo LETIMBILI nobe imibuto lemifisha LEMIBILI.

**LUHLA LWEKUTIKHUMBUTA**

Lelikhasi litawusita bahlolwa kutsi babone kutsi ngabe baphendvule linani lemibuto lekungyona lekumele bayiphendvule.

<b>SIGABA</b>	<b>TINOMBOLO TEMIBUTO</b>	<b>LINANI LEMIBUTO LEPHENDVULWAKO</b>	<b>BEKA LUPHAWU✓</b>
A: TINKONDLO (Tinkondlo letifundwe eklasini)	1–4	2	
A: TINKONDLO (Inkondlo lengakafundwa eklasini)	5	1	
B: INOVELI/TEMDZABU (Indzabambhalo nobe imibuto lemifisha)	6–11	1	
C: UMDLALO (Indzabambhalo nobe imibuto lemifisha)	12–15	1	
<b>CAPHELA:</b> ESIGABENI B ne–C, cinisekisa kutsi uphendvule YINYE INDZABAMBHALO NAMUNYE umbuto WEMIBUTO LEMIFISHA. Awukavumeleki kutsi uphendvule tindzabambhalo LETIMBILI nobe imibuto lemifisha LEMIBILI.			

**SIGABA A: TINKONDLO****TINKONDLO LETIFUNDVWE EKLASINI**

Khetsa tinkondlo tibe TIMBILI kuleti letilandzelako uphendvule ngato imibuto letawulandzela.

**UMBUTO 1: UMBUTO LOYINDZABAMBHALO**

Fundza lenkondlo lelandzelako bese uphendvula imibuto letawulandzela.

**KUHLE KETFU – OA Bhiya**

- 1 Kusemtsimbeni lomangalisako,
- 2 Kusemgidweni lowesabekako;
- 3 Bapheleketeli bamakoti banyukubele,
- 4 Buso betibukeli buncumile;
- 5 Bahlabelela kungatsi bakhatsese,
- 6 Makoti ucambalele tfwi!
  
- 7 Lomshad' uyangimangalisa!
- 8 Umlobokati wembets' iveyili yelipulango,
- 9 Umyeni wembetse letimnyama,
- 10 Bahlabeleli bambetse inyunifomu lemnyama;
- 11 Buso babo buphaphatsekile,
- 12 Imiphefumulo yab' ikhatsatekile.
  
- 13 Talukat' atililiteli;
- 14 Emajah' awaphoseki,
- 15 Tintfomb' atigidz' ekudzeni,
- 16 Bamunya tiffuph' emlonyeni,
- 17 Kungabe bayawulala badleni?
- 18 Iwil' insika yelikhaya.
  
- 19 Sicumbi setivakashi siyashuca,
- 20 Libandla lebafundisi liyahuba;
- 21 Bayolim' ensimini lengafulwa.
- 22 Likhaba lalensimu liyababa;
- 23 Likhaba lalensimu alibonwa.
  
- 24 Umbhishobh' ubusis' umlobokati,
- 25 Umbhishobh' ubhek' emculwini;
- 26 'Lutful' elutfulin' umphefumulo kuMnikati'
- 27 Liyakhemetel' etibukelini,
- 28 Iyan' imvula yetinsizi;
- 29 Umtsimba wonkh' uhluneme,
- 30 Umlobokati usele weneme.
  
- 31 Insimu bayifulatsela ngenjabulo,
- 32 Tinini tichawulana ngenjabulo,
- 33 Tibukeli titfwayitela ngenjabulo.
- 34 Sebayawusala bamkhumbula;
- 35 Sebayawusala batintsandzane
- 36 Batsandzane ngebuntsandzane.

Bhala indzatjanambhalo lapho ucoca khona ngengcikitsi yalenkondlo lengenhla ubuye uvete nendlela sonkondlo layeffule ngayo.

Budze bendzatjanambhalo yakho abube ngemagama langabi ngaphasi kwala-190 kodwa angabi ngetulu kwala-240.

[10]

## UMBUTO 2: IMIBUTO LEMIFISHA

Fundza lenkondlo lelandzelako bese uphendvula imibuto letawulandzela.

### KANTS' UPHUMULA NINI? – JJ Ncongwane

- 1 Uma ngihamb' uyagcumagcuma
- 2 **Utfutsel'** utsats' ubeke,
- 3 Ufise lok' ufise lokwa,
- 4 Wale lok' ufune lokwa;
- 5 Ngikuyise ngasemitfonjeni lepholile,
- 6 Ngihlale kulepholil' imitfunti
- 7 Ngiphumule ... wen' ushaye njalo,
- 8 Ubelelele ngesivinini sakho semihla;
- 9 Kants' uphumula nini?
  
- 10 Ngilala ngikushiy' unoma,
- 11 Ngitumeka solo wen' udidiyela,
- 12 Uhamb' ungishiy' ube ngumcubashi
- 13 Emaven' enjabulo netinsizi,
- 14 Lapho tifiso tikutfwala tikubeke khona,
- 15 Ungishiye ngisiphalat' emaphusheni;
- 16 Ungishiye ngilele ngentfokomalo;
- 17 Kants' uphumula nini?
  
- 18 Buka sebakubonile bodokotela
- 19 Kutsi laph' ukhuphuk' imicansa
- 20 Wetfwel' imicabango netifiso,
- 21 Udvons' elubikibikini lwendvumalo,
- 22 Ugabadvul' imimango yetinsizi,
- 23 Kuvakale nemoya sewushona phansi;
- 24 Uva sebatsi kufanel' uphumule,
- 25 Kants' uphumula nini?
  
- 26 Lebakwati ncono bats' ulibhikawozi,
- 27 Kuwe kuhlum' ematsemba netifiso,
- 28 Kuphekwe nelutsandvo luphuphume;
- 29 Nalokubi batsi kuvela kuwe,
- 30 Nentondvo nemavundvo kukuwe,
- 31 Kungak' usigayo lesingaphumuli,
- 32 Nasidziniwe ngulokuhle sigcakaza lokubi;
- 33 Kantsi nasewuphamba kuthula nelucolo
- 34 Utsats' ubeke taba tekudvudvuta
- 35 Kungats' ulitiko lemhlatjelo wekuthula;
- 36 Nome kunjalo kants' uphumula nini?

- 2.1 Khokha imigca yenkondlo lecuketse luchumanomaphakatsi uyibhale phasi. (1)
- 2.2 Bobani tetsamelilwati talenkondlo nawufundza emigceni 18–20 yalenkondlo? (1)
- 2.3 Humusha 'lokugcumagcuma' lokusemgceni 1 walenkondlo? (1)
- 2.4 Usuke akusiphi simo sonkondlo nasekwenteka loku lokushiwo ngulenkondlo emigceni 19–23? (1)
- 2.5 Ngumaphi lamave enjabulo netinsizi lakhuluma ngawo sonkondlo emgceni 13 walenkondlo lengenhla? Usho ngani? (2)
- 2.6 Phawula ngekuphumelela/kwehluleka kwasonkondlo ekusebentiseni leligama lelicindzetelwe emgceni wesibili kulenkondlo lengenhla. (2)
- 2.7 Akha saga SINYE lesihambisana nalenkondlo ngeligama, 'inhlitiyo', bese uyasho kutsi sihambelana ngayiphi indlela nalenkondlo. (2)
- [10]**

### UMBUTO 3: IMIBUTO LEMIFISHA

Fundza lenkondlo lelandzelako bese uphendvula imibuto letawulandzela.

#### IWIL' INSIKA – JJ Thwala

- 1 Yeka leto tikhatsi  
 2 Letendlula letingenawuphindze tibuye:  
 3 Tendlulise kwemanti lageletako  
 4 Tendlulise kwemphilo yesotsamlilo  
 5 Lenemabanga lamafisha njalo  
 6 Lendlul' ingab' isakhonjwa ndzawo.
- 7 O! nkhosikati yelikhaya,  
 8 Bekukuhl' usime ngensika,  
 9 Bekukuhl' unemtfunti wekukhosela,  
 10 Kubuhlungu kuyashacisa namuhla,  
 11 Sililo setinyembeti sodwana.
- 12 Yebo-ke, awehl' umoya ...  
 13 Insika lebeyimise lelikhaya  
 14 Kusukela kwatsi nhlo,  
 15 Idliwe ngumuhlwa yawa,  
 16 Kayiphindz' ivuke nanini.
- 17 Kuyobuye kulunge, cola ...  
 18 Nob' emanceb' opha,  
 19 Nobe tilondza tibhibha,  
 20 Nom' iminjunju ifutsa,  
 21 Kulukhuni kulitje kuwe,  
 22 Cola ... cola ... cola ...



23	Bukhulu nebutfo bakho,
24	Umusa nesimilo sakho,
25	Kuyawufakw' emehlo tedzeleli,
26	Tikuchukulute nom'usemantini
27	Ngob' ungasenansika lekumisile.
28	Emehlwen' akho kuyakwakheka
29	Emachaphoti lachucha tinyembeti,
30	Buso bakho lobubusheleleti
31	Buvele tisihla letingahhudluleki,
32	Boph' inhlitiyo ngamabopha.
33	Bamb' inhlitiyo uyibambisise,
34	Landzel 'umgudvu lofanele,
35	Tifanise nalabanye bantfu.
36	Kwemhlaba kuyendlula Mntfwanebantfu,
37	Lokwentekile kuyafana nalokwadalwa.

- 3.1 Bunkondlo buni lobuletfwa nguletinhlavu letidwetjelwe emgceni 4 walenkondlo lengenhla? (1)
- 3.2 Khokha umugca lokulenkondlo lengenhla lochaza kutsi lona lekucondziswe kuye ulungile. (1)
- 3.3 Yini kutsiwe iphethini yalenkondlo ayikahleleki? (1)
- 3.4 Kubangelwa yini kutsi lensika lekukhulunywa ngayo, itsi nangabe seyidliwe ngumuhlwa yawa, ingaphindzi ivuke nanini? (1)
- 3.5 Ngekwakho kubona yini letawubangela buso balona lekukhulunywa ngaye kulenkondlo buvele tisihla letingahhudluleki? Chaza. (2)
- 3.6 Yini sonkondlo akhetse kusebentisa leligama lelitsi, 'nkhosikati', emgceni 7? Chaza. (2)
- 3.7 Lomyalo losemgceni 34 kulenkondlo lengenhla usilungela kangakanani simo lesifana nalesi lesikulenkondlo emimangweni lesiphila kuyo? Sekela imphendvulo yakho. (2)

(2)  
**[10]**

**UMBUTO 4: IMIBUTO LEMIFISHA**

Fundza lenkondlo lelandzelako bese uphendvula imibuto letawulandzela.

**NKHOSI YEMKHATSI – OA Bhiya**

- 1 Bhalasha nkhosi yendalo yonkhe!
- 2 Bhalasha mbusi wemkhatsi wonkhe,
- 3 Bhalash' etul' emafin' esibhakabhakeni,
- 4 Indalo yonkh' isuk' ebumnyameni,
- 5 Umhlaba wonkh' utfokot' ekukhanyeni,
- 6 Bhalasha sibani semhlaba!
  
- 7 **Bukhulu** bakho buyamangalisa,
- 8 Kukhanya kwakho kuyajabulisa,
- 9 Tandla takho tifana nebutjoki,
- 10 Tandla takho tibutjok' emehlweni,
- 11 Mani njalo sibani semvelo
- 12 Khanyisa njalo liso lendalo!
  
- 13 Tonkhe timbali tiyachakata tibune,
- 14 Kukhanya kwakh' akufiphali kubune,
- 15 Umbala wakh' awugucuk' ubune,
- 16 Buso bakh' abushwaphani bubune,
- 17 Bukhulu bakh' abunciphi bubune,
- 18 Mani njalo nkhosi yemvelo!
  
- 19 Konkhe lokuphilako kusingatfwe nguwe,
- 20 Konkhe lokufako kuboliswa nguwe,
- 21 Bukhulu bakho buyesabeka ngemandl' akho,
- 22 Emandl' akho ayesabeka ngebukhulu bakho,
- 23 Kuyini lokungamelana naw' emhlabeni?
- 24 Hlala njal' ubus' emhlabeni!
  
- 25 Somandla wakugcob' etikwayo yonkh' indalo,
- 26 Bantfu netilwane kukhotsamela wena,
- 27 Inyanga netinkhanyeti kubuswa nguwe,
- 28 Laph' uvela kunyamalala konkhe,
- 29 Laph' ulele kuyakhululek' emkhatsini,
- 30 Bhalasha nkhosi yemkhatsi!
- 31 Kutfukutsela kwakho kutala Somiso.
- 32 Kutfokota kwakho kulamisa ngaMvula,
- 33 Tintsandzane tiyatfokomal' ebusika,
- 34 Tintsandzan' atibonakal' ehlobo,
  
- 35 Lunya lwakho ngiyalwesaba,
- 36 Umusa wakh' uyababateka
- 37 Noma umkhulu kangaka
- 38 Wayikhotsamel' inkhosi esiphambanweni.

- 4.1 Phindza ubhale umugca wenkondlo lonesifanangwaca endzimeni yesitsatfu. (1)
- 4.2 Khokha umugca lokulenkondlo losho kutsi loku lokukhulunywa ngako, kwabekwa kutsi kubuse tonkhe tintfo letisemhlabeni. (1)
- 4.3 Ngaphandle kwalenkhosi yemkhatsi lekukhulunywa ngayo kulenkondlo, yini lenye lekungasetjentswa kuyo ligama lekubhalasha? Nika KUNYE. (1)
- 4.4 Yini sonkondlo asebentise silinganisamcondvo saloku lokukhulunywa ngako nesibhakabhaka? (1)
- 4.5 Ucabanga kutsi yini lebangela sonkondlo atsi loku lakhuluma ngako kuyinkhosi yemkhatsi? Nika tizatfu LETIMBILI. (2)
- 4.6 Ngekubona kwakho, yini lengenteka nangabe lenkhosi yemkhatsi ingawela phasi emhlabeni. Chaza. (2)
- 4.7 Ligama lelicindzetelwe endzimeni yesibili ngabe likhetseke kahle yini? Usho ngani? (2)

(2)  
[10]

### NA

#### INKONDLO LENGAKAFUNDVWA EKLASINI

Wonkhe umhlolelwa uphokelelekile kutsi awuphendvule lombuto.

#### UMBUTO 5: IMIBUTO LEMIFISHA

Fundza lenkondlo lelandzelako bese uphendvula imibuto letawulandzela.

#### MALANDZAKATI – JP Shongwe

- 1 Nibahle-ke, malandzakati!
- 2 Nembetse bumhlophe
- 3 Kusukel' enhloko kuy' etinyaweni,
- 4 Nibahle, malandzakati.
- 5 Nifana nelichwa lembese
- 6 Sihloko seThabana Tlenyana,
- 7 Nibe njengesitfwatfwa
- 8 Silele kulo luKhahlamba.
- 9 Malandzakati, nigeze nacopha ngelubisi,
- 10 Nibukeka nibafokati, malandzakati.
- 11 Sembatfo senu
- 12 Sipholisa imivimbo yetinhlungu.
- 13 Nginitsandza niphapha,
- 14 Senifanisene nemaflu,
- 15 Nente nawo mabhongo emkhatsi,
- 16 Senitinyawana bovana.
- 17 Malandzakati nitsandzeka
- 18 Senishelela niphephuka
- 19 Kuwo emagumbi lalele
- 20 Labatinhlungu atincamuki.

- |    |                                      |
|----|--------------------------------------|
| 21 | Ninhlitiyo mhlophe, malandzakati,    |
| 22 | Aninasinini nasitsa,                 |
| 23 | Nimhlophe kuso sonkhe sive           |
| 24 | Nakuso sonkhe Sintfu.                |
| 25 | Malandzakati nibahle!                |
| 26 | Nitandla tinotfonotfo                |
| 27 | Tibalekisa buhlungu balocumako.      |
| 28 | Senimtsintsile uyatfokomala.         |
| 29 | Malandzakati, nibahle!               |
| 30 | Ngibo bumhlophe bangekhatsi          |
| 31 | Lobuvetwa sambatfo senu              |
| 32 | Lesingete sabufuta sabucedza nanini. |

[Kugeleta Imicabango: 25–26]

- 5.1 Khokha umugca lokulenkondlo losho kutsi loku lokukhulunywa ngako akunalubandlululo. (1)
- 5.2 Hlobo luni lwebunkondlo lobuletfwa ngumugca 7–8 kulenkondlo lengenhla? (1)
- 5.3 Khokha umugca loveta simo sonkondlo bekakuso nakabhala lenkondlo. (1)
- 5.4 Bobani laba sonkondlo labafanisa nalamalandza emmangweni? (1)
- 5.5 Yini kutsiwe loku lekukhulunywa ngako 'sekufanisene nemaful' emgcezi 14? (2)
- 5.6 Nawubuka indzima 5, itsini ingcikitsi yalenkondlo? (2)
- 5.7 Nangabe lamalandza afaniswa nebantfu, ummango ulindze kutsi babe ngulabanjani nawufundza lenkondlo lengenhla? Nika KUBILI. (2)

**[10]****SAMBA SESIGABA A: 30**

**SIGABA B: INOVELI/TEMZABU**

Kulesigaba kunemanoveli lamabili nencwadzi yetemdzabu. Wena-ke khetsa ibe YINYE loyifundze eklasini lonyaka uphendvule ngayo.

**CAPHELA:** Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli nobe incwadzi yetemdzabu loyifundzile. Nangabe ukhetsa kuphendvula umbuto wenzabambhalo kulesigaba, uphokelele kutsi ESIGABENI C uphendvule imibuto lemifisha.

**INOVELI**

Phendvula umbuto ube MUNYE kulamanoveli langentasi.

**UMBUTO 6: UMBUTO LOYINDZABAMBHALO****LIPHUME NEBOVU – BB Malangwane**

Bhala indzabambhalo lapho uveta khona kutsi lenoveli, *Liphume Nebovu*, inetintfo letentekako letifana nalokwenteka kulemimango lesihlala kuyo.

Indzabambhalo yakho ayibe nemagama langabi ngaphasi kwala-340 kodwa angabi ngetulu kwala-390.

**[25]****UMBUTO 7: IMIBUTO LEMIFISHA****LIPHUME NEBOVU – BB Malangwane**

Fundza lethekesthi leyincenye yenzaba bese uphendvula imibuto letawulandzela.

**ITHEKSTHI A**

'Mzala ungamangali kutsi sekwente njani. Ngitsi angikudvonse ngendlebe. Ungacali udle kudla lokushiyelwa nguzakwenu. Sonkhe sikhatsi udle naye. Uma adle wakushiyela ukucitse, ungakuniki ngisho bantfwana.'

Ahlahle emehlo manje LaMagagula ngobe asabona kutsi indzaba uyitsatsa kancane nje yinkhulu. 5

'Kantsi kwente njani yemzala, nonkhe nangililela ngasinye nje?'

'Phela kuwe bekufanele kubuye libhokisi. Kwakuvele kulungiswe kutsi ufe nalowo mntfwana.' Wacalela phasi manje kukhala LaMagagula nakeva letiga.

'Uphi nje Zakwenu? Ungambona?' Ukhuluma nje sevele uyaphuma. LaMagagula wasala watibuta watiphendvula kutsi Tintfombindzini abekuphi. 10

Kwaphela inyanga LaMagagula abuyile esibhedlela. Tintfombi abeloku akhukhubele etigangeni kungatiwa kutsi ufunani. Bantfu abebatjela kutsi ugulelwa ngumntfwanakhe. Kwesuka kwaba simanga nje kutsi intfombi lendzala iyagadwa yini. Abesangumtswalo sibili kulabantfu labahleti kubo.

Mzukwana Lushawulo efika akhandza kutsi Tintfombi abengekho ekhaya, watfukutsela watselwa ngemanti. Watsi kube avusele LaMagagula wangena elawini lakhe lapho abevamise kutihlalela khona nangafuni kube abangelwa umsindvo. Akahlalanga sikhatsi lesidze weva sekukhulekela lichegu lakaKunene lelalimetaye kakhulu. Empeleni nalo latsi kube libone imoti ingena ekhaya lase liyeta kutekwekhuta lomhlolo.	15 20
'Sinibona nani Mntungwa ngalelifu lelimnyama lelisibekele umuti wakho.'	
'Singayitsini Kunene imisebenti yebatsakatsi, loku nabo basebentela uyise Sathane.'	
'Kodwa lentfo nayentiwe ngumuntfu ngabe unesibulawela lesibi ngingafunga eMantimandze.'	
'Mine sengilhambe ngalicedza Kunene futsi nanyalo ngisetalihamba ngifuna bona bogobela labangahle banginike likhambi. Umtsakatsi ngidla naye liphaliishi, akekho khashane. Naloku ngikhuluma nje kuhuma inhloko.' Atsi kutsatsa litsamo lemahewu kucedza koma, wabuye waniketa Kunene kutsi anatse.	25
'Uyakwati kambe kutsi umtsakatsi uyaye afukame nangabe kukhona lamindzele kutsi afe? Nguko-ke loku lokwentiwa ngulomfati lomncane. Uphi nje, ungambona? Ungati kutsi LaMagagula solo abuya esibhedlela akazange alugcobe lapha ekhaya. Kusebaleni-ke kutsi abengakalindzeli kutsi abuye aphila.' Eve efikelwa kumenyanya kungatsi akatange amtsandze Tintfombi.	30
'Kodwa indzaba lenjena iyaye yentiwe njani Khumalo? Bona bemanga batsini?'	
'Kantsi utsi ngikhuluma imvabetsi yini? Mine sengiticedze tonkhe tinyanga kanye nebapholofithi ngaletigigaba letivela kulomuti wami. Tonkhe tingitjela intfo yinye. Taze tangitjela nekutsi lomtsakatsi wacala ngekungibulala inhliyiyo.'	35
	[Likhasi 96–97]

- 7.1 Bhala tintfo LETIMBILI letivetwe kuletheksti letitinkhomba tekubaluleka kwekuphilisana nanitakhamuti emmangweni. (2)
- 7.2 Yini lebeyenta Lushawulo atfukutsele aze atselwe ngemanti nakatfolo Tintfombi angekho ekhaya? Chaza ubhekise enovelini. (2)
- 7.3 Veta KUBILI lokwaba neligalelo esimilweni saLaMagagula. (2)
- 7.4 Phawula ngekuphatfwa kwesitsemu, ubhekise kuLushawulo. (2)
- 7.5 Nguyiphi intfutuko leyaletfwa nguLamagagula kaKhumalo? Bhala KUBILI. (2)
- 7.6 Ngekubona kwakho, ngabe Lushawulo wahlangabetana njani nesimo semnotfo kute alinge kusincoba? Bhala KUBILI. (2)
- 7.7 Tinkinga tini umndeni waLushawulo lebewuhlangabetana nato? Nika TIMBILI. (2)
- 7.8 Ucabanga kutsi Lushawulo bekufanele enteni emva kwekutsi emaphoyisa aseshe emtini wakhe kodwa angatfoli lutfo lolusolekako? Usho ngani? (2)
- 7.9 Kwaba namtselela muni kuyekeliswa sikolo kwaSibolile? (2)
- 7.10 Nangabe bekungatsiwa usishikashiki lesilwela emalungelo ebantfwana, nguwaphi emalungelo lamabili lebewungawalwela. Bhekisa imphendvulo yakho kulenoveli. (2)

- 7.11 Sifundvo sini lesatfolwa nguLushawulo ngekusha kwelilawu lakhe Emankayane? Chaza. (2)
- 7.12 Uvumelana/Uphikisana kangakanani nekutsi Lushawulo abengaboshwa ngesento lasenta esiphETFweni salenoveli? Sekela ngemaphuzu LAMATSATFU ubhekise emtsetfwenisisekelo waseNingizimu Afrika. (3)

[25]

**UMBUTO 8: UMBUTO LOYINDZABAMBHALO****KUBAMBA LETINGELAKO – DE Nkosi**

Bhala indzabambhalo lapho uveta khona kutsi lenoveli, *Kubamba letingelako*, inetintfo letentekako letifana nalokwenteka kulemimango lesihlala kuyo.

Indzabambhalo yakho ayibe nemagama langabi ngaphasi kwala-340 kodwa angabi ngetulu kwala-390.

[25]

**UMBUTO 9: IMIBUTO LEMIFISHA****KUBAMBA LETINGELAKO – DE Nkosi**

Fundza letheKsthi lelandzelako bese uphendvula imibuto letawulandzela.

**ITHEKSTHI B**

Inkhulumo yabo yachubeka kwaze kwefika Khulumile naMsiti, yantjintja yangena ekunikweni kwalabasikati tikhundla. Lowo nalowo waveta umbono wakhe ngekunikwa kwalabasikati tikhundla.

'Labasikati bebabalulekile kusukela kadzeni esiveni seMaswati. Babe bekuba ngubabe sibili ngamake. Namake bekuba ngumake sibili ngababe. Likhaya lelingenamake belifana nelilala. Likhaya lelinamake belishisa njengobe lisashisa nalamuhla. Umuntfu lowati lokunyenti ekhaya ngumake. Kuyashiwo nje kutsi babe ngumnikati welikhaya, kepha bekumele kugcama make ngobe nguye lowati konkhe kwelikhaya,' kusho Msiti. 5

'Bekumele kutsiwe ngumake umnikati welikhaya, hhayi indvodza,' kusho Lotifiso bahleke bonkhe loku lakushoko. 10

'Likhaya lendvodza ngaso sonkhe sikhatsi. Ngiko nje kugcama sibongo sayo. Make lisekela ekuphatfweni kwelikhaya,' kusho Msiti.

'Ngumbono wakho lowo Methula. Nalabasikati banawo emakhaya abo labaticalele wona phasi,' kukhuluma Khulumile. 15

'Angiphikisani naloko lokwentekako. Liciniso lelo kutsi banato tindlu hhayi emakhaya. Kuze kube likhaya uma sekunendvodza lapho,' kubelesela Msiti. Wachubeka watsi, 'ningicolele tihlobo tami ngiyatidlalela bo.' Bahleka bonkhe ngobe babona kutsi lapha sekudlalwa ngenchazamagama nenshokutsi yawo. Sekubukwa emagama lalandzelako: likhaya nendlu kutsi ngabe asho kutsini. Lowo nalowo ucondze kuwanika inshokutsi lehambisana naye. 20

'Likhaya likhaya ngamake. Ngiko nje kuye kutsiwe lapha kukaLaNdlela, kukakhe LaNdlovu noma kukakhe LaBhembe. Loko kukhombisa kubaluleka kwamake ekhaya,' kusho Mphikeleli.

'Akhona emadvodza lekamadvodza ngetibongo emakhaya awo. Nitsini-ke ngalawo madvodza?' Kubuta Lotifiso. 25

'Simo sekuntjintja kwelive senta kutsi imisebenti ibe khashane, ngiso lesenta kutsi babe efike ngakanye ekhaya. Loko kwenta kutsi nebantfwana bangamati ngalokuphelele. Kusebenta khashane kuyimbangela leyenta indzima lebanjwa ngubabe ekhaya ibe yincane. Loko kwenta likhaya limiswe ngumake,' kuphendvula Mphikeleli. 30

'Make lihlo, sisekelo, umsiti nemelekeleli wababe. Ngiko nje kumele abikele babe ngako konkhe lokwenteka ekhaya,' kusho Msiti.

'Kubaluleka kwebantfu labasikati esiveni seMaswati kusukela etindlovukazini LaYaka Ndwandwe lowatala Ngwane III, Somnjalose Simelane lowatala Sobhuza I, lobuye atiwe ngalelitsi Somhlolo, Tsandzile Ndwandwe lowatala Mswati II, Sisile Khumalo lowatala Ludvonga II, Gwamile LaBotsibeni Mdluli lowatala Mbandzeni naLoMawa Ndwandwe lowatala Sobhuza II, Indzima lebanti yebukhosi beMaswati ibanjwe tindlovukazi kusukela kadzeni kuze kube sikhatsi sanyalo. Bukhosi besive seMaswati basimama batinta ngenca yetindlovukazi,' kusho Mphikeleli. 40

[Likhasi 69–70]

- 9.1 Emandla ekubusa ebantfu labasikati, abebonakala ngayiphi indlela esikhatsini lesengcile? (2)
- 9.2 Nika tibonelo LETIMBILI temaphuphotifiso Mphikeleli labekasho wona. (2)
- 9.3 Liphumelela njani likhaya lapho indvodza itsatsa tincumo khona, njengoba kwenteka kaMvakali? (2)
- 9.4 Tintfo tini LETIMBILI lebekumele Magumeni atente njengemuntfu labengativa kahle emtimbeni lapha emhlanganweni? (2)
- 9.5 Lisinamuva liyabukwa. Sekela lesaga ubhekise kuMatsiya. (2)
- 9.6 Kungabi khona kwebatali baMphikeleli kube namtselela muni emphilweni yakhe yonkhe? Sekela imphendvulo yakho ngalokwenteka kulenovel. (2)
- 9.7 Njengobe Velakhe angumntfwana waMphikeleli kuningi sive lesitakulindzela esimilweni sakhe nasakhulile? Nika KUBILI lokutawulindzelwa sive. (2)
- 9.8 Nguliphi likhambi leliletwe eNingizimu Afrika leliphatselene nemfundvo yalabadzala, lelesekelwa kulenovel? (2)
- 9.9 Phawula ngesento saMphikeleli sekutsi atsi asamele imphendvulo esikolweni, abe angenela lukhetfo lwetembusave. (2)
- 9.10 Catsanisa emavi aLaDladla lasesingenisweni salenovel latsi, 'lapha emhlabeni kusa kusa,' nesiphetfo salenovel. (2)
- 9.11 Kuliciniso kangakanani kutsi emuva kwaleyo naleyo ndvodza lephumelelako, kunamake loyesekelako. Sekela imphendvulo yakho ubhekise kuletheksthi lengenhla. (2)
- 9.12 Bhala tintfo LETINTSATFU locabanga kutsi labasikati balamuhla bawesekela ngato bayeni babo. (3)

[25]

**NOBE**



**UMBUTO 10: UMBUTO LOYINDZABAMBHALO****SILULU SEMASWATI – NC Mthethwa**

Bhala indzabambhalo lapho uveta khona sakhiwo setemibhalo yetemdzabu ubhekise kulenganekwane netibongelelo letilapha ngentasi. Indzabambhalo yakho yibhekise kulemibhalo yemdzabu lelandzelako:

- 'Umfati enyangeni'
- 'Tibongo TeNgwenyama Bhunu'

Indzabambhalo yakho ayibe nemagama langabi ngaphasi kwala-340 kodwa angabi ngetulu kwala-390.

**[25]****UMBUTO 11: IMIBUTO LEMIFISHA****SILULU SEMASWATI – NC Mthethwa**

Fundza lethekesthi lelandzelako bese uphendvula imibuto letawulandzela.

**ITHEKSTHI C****KUFIKA KWEKUFA**

Lokwa endvulo ematje asemanti, Mlentengamunye waphosa liso lakhe lelikhulu emhlabeni, wakhangwa bantfu bakhe bafa baphela, bacedwa kufa. Wabita lunwabu, walutfuma kutsi alugijime luye emhlabeni lufike lutjele bantfu kutsi bangasafi, baphile kudzine kube ngunaphakadze. Waludvonsa ngendlebe kutsi lungase lulinge lulibatiseke endleleni, alunonophe impela lungemi nekuma loku. 5

Phela lunwabu belutendlula tonkhe tilwane ngematubane. Nembala luvume lunwabu, lusuke lutsatsele ngematubane selubhekise emabombo emhlabeni. Ngulo lolwa selucondze kaMhlaba.

Endleleni lukhangwe tihlahla tebukhwebeletane titsele tikhehlete titselo tidzine setilengela phasi. Pho luyatifela ngebukhwebeletane. Khimilili, Lunwabu. 10  
Lucalacalate bese lutsi; 'Awutsi ngitsi kukha kabili, katsatfu nginambitse letitselo ngive kutsi tiyanambitseka yini,' lusho njalo luyaphambuka endleleni lucondza etihlahleni tebukhwebeletane. Lufike luhulule titselo luphose emlonyeni, luloboshele, luloboshele, lushaye sentfwala.

Atsi uyabuka Mvelincanti emhlabeni, abone bantfu bakhe baloku bayafa futsi abasafeli kwalapha. Kumale kutsi angaloku alindzele lunwabu ekuhambiseni umbiko wakhe ebantfwini. Loku naku nembiko awukefiki, bantfu bayaphela ngekufa. Asale atidzela abite intfulo. 15

'Ntfulo gijima uye emhlabeni, ufike utjele bantfu kutsi ngeke bafe batawuphila kube phakadze,' kusho Mvelinchanti atjela intfulo umlayeto lomusha loya ebantfwini. 20  
Ivume intfulo, isho isuka ngematubane seyintininita ilibangise emhlabeni.

Lunwabu aluyingene, luchwakele esihlahleni ludla bukhwebeletane. Luloku lutsi; 'Awutsi ngidlayidle bo, ngitawubuye ngihambe.'

[Likhasi: 49–50]

11.1 Ngutiphi timphawu LETIMBILI, letenta kutsiwe lenganekwane ibe yinganeko? (2)

11.2 Kwephuka kwemyalo, kutfolakala kuphi kulenganekwane? Chaza. (2)

- 11.3 Ngusiphi sigameko lesiletsa bungane kwane, kulengane kwane? Usho ngani? (2)
- 11.4 Catsanisa lunwabu lolukulengane kwane nelunwabu lesilubona kulamalanga alomuhla. (2)
- 11.5 Phawula ngekushayisana kwalemibiko lebeyitfunywe lunwabu nentfulo kulengane kwane lengenhla. (2)
- 11.6 Utsini umbono wakho ngaloku lokwentiwa lunwabu kulengane kwane lengenhla nawubuka simo semphilo yalomuhla? (2)
- 11.7 Sifundvo sini lesitfolakala kulengane kwane? Chaza ngemaphuzu LAMATSATFU. (3)

**NA**

Fundza letibongelelo letilandzelako bese uphendvula imibuto letawulandzela.

**ITHEKSTHI D****SIKHUNGO SASEMATSAMO**

- 1 Ulidvonsamehlo sikhungo setimangaliso,
- 2 Kuwe kubonakala labadzala nalabancane,
- 3 Kuwe kubonakala labamnyama nalabamhlophe,
- 4 Sibona bomake netidziya netidwaba,
- 5 Sibon' ematjiti ngendlamu nemihelwane,
- 6 Sibona tintfombi ngemahiya netimvadla,
- 7 Sibon' emajaha ngengwe nenkhonyane,
- 8 Sibon' emadvodza ngemajobo nemibhenso,
- 9 Sibon' emachegu ngencincane nemibhodze.
- 10 Ngawe sati inchoboza nencoshane,
- 11 Ngawe sati indvuli nelikhwane,
- 12 Ngawe sati **imidvonso nelikhotsamo**,
- 13 Ngawe sati **ingcongwane nemshayo**,
- 14 Ngawe sati imiganu nelishongwe,
- 15 Ngawe sati imigwenya nemihlanga.

[Likhasi 118]

- 11.8 Khokha umugca locuketse sifanisongco kuletibongo letingenhla uwubhale phasi. (1)
- 11.9 Bunkondlo buni lesibuvetelwa ngemagama ekugcina emigceni 5 na-7? (1)
- 11.10 Isetjentiselwani inchoboza lapha kulesikhungo saseMatsamo? Bhala KUNYE. (1)
- 11.11 Hlobo luni lwemvunulo lolu lolubitwa ngekutsi ngumbhodze? (1)
- 11.12 Ucabanga kutsi letintfo leticindzetelwe emgceni 12–13, tibaluleke ngani kulesikhungo saseMatsamo. (2)
- 11.13 Yini lengenta kutsi ukhutsate kwakhiwa kwetikhungo letifana naleti. Bhala kube KUBILI. (2)
- 11.14 Lesikhungo saseMatsamo sihambisana kahle kakhulu nemtsetfosisekelo welive lophatselene nentsandvo yelinyenti. Vumela nobe uphikise lesitatimende bese wesekelel imphe ndvulo yakho. (2)

**[25]****SAMBA SESIGABA B: 25**

**SIGABA C: UMDLALO**

Kulesigaba kunemidlalo lemibili. Wena-ke khetsa ube MUNYE lowufundze eklasini lonyaka uphendvule ngawo.

**CAPHELA:** Khetsa emkhatsini WENDZABAMBHALO NEMIBUTO LEMIFISHA kulowo nalowo mdlalo lowufundzile. Nangabe ukhetse kuphendvula umbuto wenzabambhalo enovelini/temdzabu, uphocelelekile kutsi kulesigaba uphendvule imibuto lemifisha. Nangabe ukhetse kuphendvula imibuto lemifisha enovelini/temdzabu, uphocelelekile kutsi kulesigaba uphendvule umbuto wenzabambhalo.

**UMBUTO 12: UMBUTO LOYINDZABAMBHALO****KWAHLWA EMINI – JJ Thwala**

Bantfu lophilisana nabo, bangayiphumelelisa nobe bayidvonsele ebubini imphilo yakho. Bhala indzabambhalo lapho wesekela khona lesitatimende ngekubhekisa kuNkhanise.

Indzabambhalo yakho ayibe ngemagama langabi ngaphasi kwala-340 kodwa angabi ngetulu kwala-390.

**[25]****UMBUTO 13: IMIBUTO LEMIFISHA****KWAHLWA EMINI – JJ Thwala**

Fundza lethekesthi lelandzelako bese uphendvula imibuto letawulandzela.

**ITHEKSTHI E**

*(LaHlatjwako ukhuluma naMakhosi basedladleni)*

LAHLATJWAKO: Utsini umbono wakho ngaloku lokuvako nalokukhulunywako ngawe?

MAKHOSI: Kute lengingakusho make ngoba kukhulunyelwa khashane nami. Kute losondzela edvute nami abeke sikhalo sakhe kuze nami 5 ngitiphendvulele.

LAHLATJWAKO: Kuyatiwa mfana wami kutsi umuntfu losesikhundleni uyahletjwa, kukhulunye kabi nobe kahle ngaye. Loku lonkwenteka kuwe kungetulu kwemandla akho. Uyakubona yini loko?

MAKHOSI: Cha, angikuboni make. Ngibona simo sifana nato tonkhe timo 10 letikhona. Nkhanise ngimfanisa namabibini inyoka lengenabutsi. Ndzabeni ngubhova longenamatinyo. Ngedze ingadvula leyaphiwa emandla yeswela lulaka. Ngako-ke make ungetfuki. Abasiyo ingoti bobatsatfu labantfu.

LAHLATJWAKO:	Lalela mine ngikutjele ndvodzana. Ngiyakubona ulunjiwe kutsi usimbatseke futsi ulitjatiswe kungundzata nje ungaphumi nelivi lekungilo. Uhleti ngaphansi kwesifu lesingakungcivita nobe kunini. Imphilo yakho izulelwa ngemangce. Yekela kutsatsela tintfo phansi! Kungahlwa emini sisale simunya tiftfupha.	15
MAKHOSI:	Maye netfuswa lite. Ayihlabi ngakumisa. Labantfu labakhulumela futsi ngemagogogo nje labanga umsindvo lomkhulu mahhala. Batangitfolaphi ngoba angihlali nabo; angidli nabo futsi angisondzeli kubo.	20
LAHLATJWAKO:	Emachinga emuntfu ngeke uwacedze. Uma umuntfu atimisele kwenta tintfo, usebentisa onkhe emakhono lanawo agcine aphumelele.	25
MAKHOSI:	Kuyawugcina mine hhayi bona. Ngimi gcinalishone. Kuhlanguana kwabo kumakhata, nobe kushisa, angeke, kbasite ngalutfo.	
LAHLATJWAKO:	Makhosi.	
MAKHOSI:	Mhayise lomuhle.	30
LAHLATJWAKO:	Utsini ngelibito lakho lekukhulunywa ngalo kuwo onkhe emadladla, emalawu netintsanga? Uyivile lengoma lebeyihlatjelwa lilima lakaNdlondlo letsi:	
	Sitekeleni madlot' esive, Sitekeleni bogogo bo! Ngabe Makhosi uyawulibusa Ahlal' esihlalwen' akhibike, Imihlangan' ibhokile bo? Khanyisani madlot' esive, Khanyisani bogogo bo.	35
MAKHOSI:	Loko kusho ludvumo lwami make. Nakute intfo lobaluleke ngayo ebantfwini, angeke bakhulume ngawe. Libito lami lisemilonyeni yebantfu nje likhombisa kona kutsi ngiyaphila.	
LAHLATJWAKO:	Sewuke waphuma yini Makhosi wayawuhlaluba etangomeni nasetinyangeni kutsi lusuku lwangeMgcibelo lutawuhamba njani?	45
MAKHOSI:	Angikholelwa ekuhlalubeni, ngoba konkhe lengitawutjelwa kona angeke ngikwemukele. Kimi kufana nekutsela emanti emhlane welidada. Angifuni kutihlupha ngentfo lengingahambisani nayo. ( <i>Aphume Makhosi acondze elawini</i> )	

[Likhasi 86–88]

13.1 Bhala tintfo LETIMBILI letiholela ekutseni baholi bahletjwe. Bhekisa imphendvulo yakho kuMkhalelwa.

(2)

- 13.2 Ngaphandle kwekutsi Sicongo ungumuntu loneludlame, yini lenye lengenta kutsi sikhundla lebekanganikwa sona simehlule? Chaza ngemaphuzu LAMABILI lakulomdlalo. (2)
- 13.3 Ngusiphi sigameko lesifakazela kutsi ligama laMakhosi kukhulunywa ngalo emalawini njengobe kushiwo lapha kuletheksthi? (2)
- 13.4 Sijeziso sini lebesitawunikwa boNdzabeni naNgedze nakutfolakala kutsi basifakile sandla ekushoneni kwaboNkhanise? Chaza ubhekise endleleni lekutsetfwa ngayo emacala asebukhosini bakaNhlapho. (2)
- 13.5 Yini lebangela umbhali kutsi ente Makhosi asalele emuva, Ndleleni acale phambili esiphetfweni salomdlalo? (2)
- 13.6 Catsanisa sikhatsi lebesisetjentwa ngumholi welive loyinkhosi kulomdlalo nesikhatsi lesinikwa baholi etikhatsini talomuhla. (2)
- 13.7 Ngekubona kwakho Ntfwasahlobo bekufanele asitakale ngayiphi indlela kulesimo lakuso kube bekaphila kuletheksthi talomuhla? Nika KUBILI. (2)
- 13.8 Ludweshu lolusemkhatsini waNkhanise naMakhosi, luwutfukisa ngayiphi indlela lomdlalo? Chaza. (2)
- 13.9 Lilumbo lidla umnikati. Humusha kuhambelana kwalesaga nemlingisi longuNdzabeni. (2)
- 13.10 Nangabe bantfu lababili batsandzana, kubalulekile kutsi besekelane etinkingeni nasebumatimeni labahlangabetana nato. Lungile wakuphumelelisa ngayiphi indlela loku? Nika KUBILI. (2)
- 13.11 Humusha lesaga lesitsi, 'Akabalwa emantjwele inkhukhu ingakachamuseli,' ubhekise kuNkhanise. (2)
- 13.12 Bhala tintfo LETINTSATFU lebetitawubanga kutsi LaJele aphantseke kabi njengobe Nkhanise angakabutfoli lobukhosi. (3)

**[25]**

**UMBUTO 14: UMBUTO LOYINDZABAMBHALO****UMVUZO – NS Nzima**

Bantfu lophilisana nabo bangayiphumelelisa nobe bayidvonsele ebubini imphilo yakho. Bhala indzabambhalo lapho wesekela khona lesitatimende ngekubhekisa kuSatile.

Indzabambhalo ayibe nemagama langabi ngaphasi kwala-340 kodwa angabi ngetulu kwala-390.

**[25]****UMBUTO 15: IMIBUTO LEMIFISHA****UMVUZO – NS Nzima**

Fundza lethekesthi lelandzelako bese uphendvula imibuto letawulandzela.

**ITHEKSTHI F**

MAPHAHLA: Ngabe bagcoki bayakholelwa emadlotini?

SHABALALA: Angeke ngikhulumele letinye tive, kepha ngitawuphawula loku lokulandzelako. Uma uhamba emigwacweni ubona tiphambano netimbali letinyenti letikhombisa kutsi lomunye wemindeneni yabo umphefumulo wakhe waphumela lapho. Indzawo lekuphumele kuyo umphefumulo iyahlonishwa njengesivivane kitsi. Lithuna liyakhiwa, linakekelwe, likhunjulwe, ligcanyiswe, livakashelwe nalokunye lokunyenti. Loko kwenteka ngemaholide nangetimphelasontfo. 5

MAPHAHLA: Inchazelo yakho thishela ikhombisa kutsi ligama lelitsi emadloti nje lelingaphinyiswa, kepha kwenta kwabo kukhombisa ngalokusobala kutsi umuntfu losahambile uyahlonishwa, akalitjalwa, kwatiswa batukulu ngaye kukhunjulwe kubuye kugcanyiswe nemisebenti yakhe. 10

SHABALALA: Lokunye lengifuna kucace kahle futsi kugcame emicondweni yenu kutsi asikho sive lesikhonta emadloti njengobe kuhlambalata labatsite. Tonkhe tive tikhonta Mlentemunye noma Nkulunkulu ngetindlela letehlukene. Kadzeni bekucelwa emadloti kutsi abakhulumele naMlentemunye. Konkhe bebakucela ngaleyo ndlela bebakutfo. Bekukhontwa Mlentemunye ngendlela yemadloti. 15

MAPHAHLA: Kuyabonakala kutsi kunyenti kakhulu kuhlambalata nekukhobosa lokwentiwe ngulabo labangananateli. 20

SAKHILE: Labo labangananateli kumele bafundziswe kuhlonipha emalungelo alabanye, bayekele kukhobosa emasiko nemihambo yaletinye tive.

SHABALALA: Incabhayi yekuhlonishwa kwemasiko netinchubo tetive letehlukene isemahlombe enu. Live letfu linemihlobohlobo netilwimilwimi ngako-ke kumele kube khona kusebentisana, kuvelana, kukhutsatana, kwemukelana nebunye. Ngiko nje sibitwa ngesive lesingumushi wenkhosatane. Loko kugcama kahle emiphumeleni lesemcoka naletfutukisako 25

MAPHAHLA: Bangasitakala kanjani labantfu labangananateli? 30

SHABALALA:	Abafundziswe lulwimi lweSiswati, emasiko nemihambo yetfu. Akuphilwe, kuhlalwe, kusetjentwe kubuye kuhranganyelwe nabo kuto tonkhe tibhimbi.	
BATJELE:	Mine nginembono lowehlukile ngekutsi kukhona labangananateli nalabananatelako. Loko ngikubona kulubandlululo lolunye. Umuntfu longenaso sinanatelo kumele ananatele ngesibongo sesikhulu nome inkhosi langaphasi kwayo. Tibonelo nje nguleti letilandzelako; Etigodzini teNkomazi kwatiwa tibongo letilandzelako; Ngomane, Maziya, Mahlalela naletinye. Etigodzini teMlumati kwatiwa tibongo letilandzelako; Mhlongo, Shongwe, Mkhatjwa naletinye. Tonkhe tindzawo letiseSwatini nasesifudzaveni iMpumalanga tinebukhosi lobutsite lobukhona kumele buhlonishwe.	35 40
SHABALALA:	Liciniso leli lewulivetako mfundzi noma lokunyenti sekufiphele. Kumele bacwaningi bakitsi bakuvete live lonkhe likwati. Umkhondvo nemaphetselo utsintsa bakaNkosi belusendvo lwakaNdlala, bakaTsabetse, Mtsetfwa naletinye tibongo. Umsukaligwa naseTimbalini bakaNhlapho, kantsi Ligwa nekuyela eMhlongamvula bakaShabalala. Uma uncamura umfula iMgwenya uya enyakafto utfola bukhosi bakaMbuyane, bakaShabalala, bakaMnisi nalobunye. Asitfole imibuto yekugcina lechamuka kini bafundzi.	45 50
SAKHILE:	Imibuto lebesinayo iphendvuleke yonkhe thishela. Sibonga kakhulu kuphendvula imibuto yetfu lebeyitsintsa temlandvo, lulwimi, tempilo naleminyane imikhakha yemphilo.	
SHABALALA:	Nginifisela kufundza lokuhle nemphumelelo etifundweni tenu. Sifuna kunibona nilandzela imikhakha yemfundvo leyehlukene emayunivesithi ngemnyaka lotako. Lokuhle kodwa!	55

[Likhasi: 50–54]

- 15.1 Khokha umugca lokuletheksthi lofazela kutsi ummango unetifiso letinhle ngemphumelelo yebantfwana. (2)
- 15.2 Ngusiphi siphakamiso lesishiwo nguBatjele lekukhulunywa ngaso kuletheksthi lesiphambene nemihambo yeSiswati? (2)
- 15.3 Ngutiphi tindlela tekufundzisa letisetjentiswa nguthishela Shabalala letikhombisa kutsi uhambisana nalokushiwo Sitatimende Sekharikhulamu Yavelonkhe? Nika tibe TIMBILI. (2)
- 15.4 Lomdlalo unenselelo yesakhiwo. Sekela lesitatimende ngemibono LEMIBILI. (2)
- 15.5 Phawula ngemaphuziu LAMABILI ngesento sekulandwa kwebantfu nekubekwa kwetimbali emigwacweni lapho basuke bashonele khona. (2)
- 15.6 Nawubhekisa engcikitsini yalomdlalo, tibaluleke ngani tinanatelo? (2)
- 15.7 Shano kutsi Sakhile usicaba nobe uyindilinga yini, bese wesekela ngesigameko SINYE setintfo latentako emdlalweni. (2)

- 15.8 Sakhiwana saletheksthi lengenhla sibaluleke kangakanani ekubumbaneni kwesakhiwo semdlalo wonkhe? Chaza. (2)
- 15.9 Emkhatsini waLaNgwenya naFakudze, ngumuphi umdlali lovisisako nakukhulunywa naye? Usho ngani? (2)
- 15.10 Sifundvo Setemlandvo, Shabalala labafundzisa ngaso kuletheksthi lengenhla, simsita ngani Batjele esimeni lesikhona lomuhla eNingizimu Afrika? Chaza. (2)
- 15.11 Umbhali ucondze kuwutjelani ummango ngalomdlalo wakhe? Bhala kube kubili. (2)
- 15.12 Lusuku lwangamhlaka-24 Inyoni lubaluleke ngani etimphilweni tebantfu balomuhla? Nika KUTSATFU. (3)  
[25]

**SAMBA SESIGABA C: 25**  
**SAMBA SAKO KONKHE: 80**